



Comhairle an
Aontais Eorpaigh

An Bhruiséil, 4 Aibreán 2025
(OR. en)

7285/25

Comhad Idirinstitiúideach:
2025/0054(NLE)

FISC 73
ECOFIN 309

GNÍOMHARTHA REACTACHA AGUS IONSTRAIMÍ EILE

Ábhar:	CINNEADH CUR CHUN FEIDHME ÓN gCOMHAIRLE lena n-údaráítear an tSlóvaic beart speisialta a thabhairt isteach de mhaolú ar Airteagal 26(1), pointe (a) agus Airteagail 168 agus 168a de Threoir 2006/112/CE maidir leis an gcomhchóras cánach breisluacha
--------	--

CINNEADH CUR CHUN FEIDHME (AE) 2025/...ÓN gCOMHAIRLE

an ...

**lena n-údaraítear an tSlóvaic beart speisialta a thabhairt isteach
de mhaolú ar Airteagal 26(1), pointe (a)
agus Airteagail 168 agus 168a
de Threoir 2006/112/CE maidir leis an gcomhchóras cánach breisluacha**

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh,

Ag féachaint do Threoir 2006/112/CE ón gComhairle an 28 Samhain 2006 maidir leis an gcomhchóras cánach breisluacha¹, agus go háirithe Airteagal 395(1), an chéad fhomhír, de,

Ag féachaint don togra ón gCoimisiún Eorpach,

¹ IO L 347, 11.12.2006, lch. 1, ELI: <http://data.europa.eu/eli/dir/2006/112/oj>.

De bharr an mhéid seo a leanas:

- (1) Le hAirteagail 168 agus 168a de Threoir 2006/112/CE, rialaítear ceart na ndaoine inchánacha an cháin bhreisluacha (CBL) a ghearrtar ar sholáthairtí earraí agus seirbhísí a úsáideann siad chun críocha a n-idirbheart cáinmhuirearaithe a asbhaint. Tá ceanglas in Airteagal 26(1), pointe (a), den Treoir sin, cuntas a thabhairt ar CBL nuair a úsáidtear sócmhainn ghnó chun críoch príobháideach daoine inchánacha nó a bhfoirne nó, ar bhonn níos ginearálta, chun críoch eile seachas críocha a ngnó.
- (2) Le litir a cláraíodh leis an gCoimisiún an 5 Samhain 2024, d'iarr an tSlóvaic údarú ón gCoimisiún i gcomhréir le hAirteagal 395(2), an chéad fhomhír, de Threoir 2006/112/CE chun beart speisialta a thabhairt isteach de mhaolú ar Airteagal 26(1), pointe (a), agus ar Airteagail 168 agus 168a den Treoir sin chun teorainn 50 % a chur leis an gceart chun CBL a asbhaint ar chaiteachas a bhaineann le feithiclí áirithe nach n-úsáidtear go hiomlán chun críoch gnó, agus gan caitheamh le húsáid na bhfeithiclí sin a áirítear i sócmhainní gnó duine inchánach chun críoch neamhghnó mar sholáthar seirbhísí ar chomaoín, i gcás ina raibh an fheithicil sin faoi réir teorannú den sórt sin ('an beart speisialta').

- (3) Cumhdaítear leis an mbeart speisialta a iarradh feithiclí, nach n-úsáidtear go hiomlán chun críoch gnó, is iad sin mótarfeithiclí i gcatagóir M₁, mar a shonraítear i Rialachán (AE) 2018/858 ó Pharlaimint na hEorpa agus ón gComhairle², agus gluaisrothair i gcatagóirí L1e agus L3e, mar a shonraítear i Rialachán (AE) Uimh. 168/2013 ó Pharlaimint na hEorpa agus ón gComhairle³. Na feithiclí sin a cheannach, a fháil laistigh den Chomhphobal, a allmhairiú agus a léasú, sin iad na hidirbhearta a chumhdaítear. Áirítear leis an teorannú ar an gceart chun CBL a asbhaint caiteachas ar pháirteanna spártha, gabhálais, seirbhísí agus breoslú atá beartaithe do na feithiclí sin.
- (4) Ba cheart feithiclí áirithe a eisiamh ó raon feidhme an bhirt speisialta ós rud é, mar gheall ar an gcineál gnó ar lena aghaidh a n-úsáidtear iad, go meastar gur diomaibhseach aon úsáid nach úsáid ghnó í. Dá bhrí sin, níor cheart feidhm a bheith ag an mbeart speisialta maidir le mótarfeithiclí nó gluaisrothair a cheannaítear lena n-athdhíol, lena bhfruiiliú nó lena léasú nó a úsáidtear chun paisinéirí a iompar ar chomaoín, lena n-áirítear seirbhísí tacsáí, chun ceachtanna tiomána a sholáthar, chun críoch tástála nó mar athsholáthar ar feithiclí a bhfuil oibreacha á ndéanamh orthu.
- (5) I gcomhréir le hAirteagal 395(2), an dara fomhír, de Threoir 2006/112/CE, tharchuir an Coimisiún an iarraidh a rinne an tSlóvaic chuig na Ballstáit eile le litir dar dáta an 29 Samhain 2024. Le litir dar dáta an 2 Nollaig 2024, thug an Coimisiún fógra don tSlóvaic go raibh an fhaisnéis uile is gá aige chun measúnú a dhéanamh ar an iarraidh.

² Rialachán (AE) 2018/858 ó Pharlaimint na hEorpa agus ón gComhairle an 30 Bealtaine 2018 maidir le ceadú mótarfeithiclí agus a leantóirí, agus córais, comhpháirteanna agus aonad teicniúil ar leithligh atá ceaptha le haghaidh feithiclí den sórt sin, agus faireachas margaidh orthu, lena leasaítear Rialacháin (CE) Uimh. 715/2007 agus (CE) Uimh. 595/2009 agus lena n-aisghairtear Treoir 2007/46/CE (IO L 151, 14.6.2018, lch. 1, ELI: <http://data.europa.eu/eli/reg/2018/858/oj>).

³ Rialachán (AE) Uimh. 168/2013 ó Pharlaimint na hEorpa agus ón gComhairle an 15 Eanáir 2013 maidir le ceadú agus le faireachas margaidh ar feithiclí dhá nó trí roth agus cuadrothair (IO L 60, 2.3.2013, lch. 52, ELI: <http://data.europa.eu/eli/reg/2013/168/oj>).

- (6) Chuir an tSlóvaic míniú leis an iarraidh ar na cúiseanna leis an gcéatadán don teorannú ar an gceart chun CBL a asbhaint a shocrú ag 50 %. Chun na críche sin, d'úsáid an tSlóvaic sonraí a fuarthas ó ghníomhaíochtaí rialaithe agus ó iniúchtaí, mar aon le suirbhé a rinneadh le gnólachtaí. De réir na Slóvaice, mar thoradh ar an anailís ar na sonraí sin, socraíodh an céatadán ag 50% mar athróg ionadach chruinn ar dháileadh úsáid na bhfeithiclí a bhfuil an beart speisialta beartaithe dóibh, is é sin an dáileadh idir críocha príobháideacha agus críocha gnó.
- (7) Áitíonn an tSlóvaic go mbeidh tionchar dearfach ag an mbeart speisialta maidir leis an ualach riaracháin ar cháiniocóirí agus údarais chánach trí bhailiú CBL a shimpliú agus imghabháil cánach trí thaifid mhíchearta a choimeád a chosc. Ar na cúiseanna sin, measann an Coimisiún gurb iomchuí an tSlóvaic a údarú chun an beart speisialta a chur i bhfeidhm go dtí an 30 Meitheamh 2028.
- (8) Ba cheart an beart speisialta a theorannú don am is gá chun meastóireacht a dhéanamh ar éifeachtacht agus ar oiriúnacht an teorannaithe céatadáin arna chur i bhfeidhm.
- (9) Tá an beart speisialta comhréireach leis na cuspóirí atá á saothrú, is iad sin an nós imeachta um bailiú CBL a shimpliú agus cineálacha áirithe imghabhála cánach nó seachanta cánach a chosc, ós rud é go bhfuil sé teoranta ó thaobh ama agus raon feidhme de. Ina theannta sin, ní fhágann an beart speisialta go mbeidh riosca ann go n-aistreofaí calaois chuig earnálacha eile nó chuig Ballstáit eile.

- (10) I gcás ina measfaidh an tSlóvaic go mbeidh gá le síneadh a chur leis an mbeart speisialta tar éis an 30 Meitheamh 2028, ba cheart di iarraidh ar shíneadh den sórt sin a chur faoi bhráid an Choimisiúin faoin 30 Meán Fómhair 2027. Ba cheart tuarascáil maidir le cur i bhfeidhm an bhirt speisialta a bheith ag gabháil leis an tuarascáil sin, ina mbeidh athbhreithniú ar an teorannú céatadáin arna chur i bhfeidhm.
- (11) De réir na faisnéise a sholáthair an tSlóvaic, ní bheidh ach éifeacht dhiomaibhseach ag an mbeart speisialta ar mhéid foriomlán an ioncaim cánach a bhailíonn an tSlóvaic ag céim an tomhaltais deiridh, agus ní bheidh aon drochthionchar aige ar acmhainní dílse an Aontais a fhabhraítear ó CBL,

TAR ÉIS AN CINNEADH SEO A GHLACADH:

Airteagal 1

1. De mhaolú ar Airteagail 168 agus 168a de Threoir 2006/112/CE, údaraítear Poblacht na Slóvaice teorainn 50 % a chur leis an gceart cáin bhreisluacha (CBL) ar chaiteachas ar na catagóirí feithiclí seo a leanas, nach n-úsáidtear go hiomlán chun críoch gnó, a asbhaint:
 - (a) mótarfheithiclí i gcatagóir M₁, mar a shonraítear in Airteagal 4(1), pointe (a)(i), de Rialachán (AE) 2018/858;
 - (b) gluaisrothair i gcatagóir L1e, mar a shonraítear in Airteagal 4(2), pointe (a), de Rialachán (AE) Uimh.168/2013;
 - (c) gluaisrothair i gcatagóir L3e, mar a shonraítear in Airteagal 4(2), pointe (c), de Rialachán (AE) Uimh. 168/2013.
2. Ní bheidh feidhm ag mír 1 maidir le feithiclí a úsáidtear nó a cheannaítear le haghaidh na nithe seo a leanas:
 - (a) athdhíol, frúiliú nó léasú;
 - (b) paisinéirí a iompar ar chomaoín, lena n-áirítear seirbhísí tacsáí;
 - (c) ceachtanna tiomána a sholáthar;
 - (d) críocha tástála;
 - (e) mar athsholáthar ar fheithiclí a bhfuil oibreacha á ndéanamh orthu.

Airteagal 2

De mhaolú ar Airteagal 26(1), pointe (a), de Threoir 2006/112/CE, maidir le feithicil dá dtagraítear in Airteagal 1(1) agus a áirítear i sócmhainní gnó duine inchánaigh, údaraítear an tSlóvaic gan caitheamh le húsáid feithicle den sórt sin chun críoch neamhghnó mar sholáthar seirbhísí ar chomaoín, i gcás ina raibh an fheithicil sin faoi réir teorannú a údaraítear faoi Airteagal 1 den Chinneadh seo.

Airteagal 3

Cumhdóidh an caiteachas dá dtagraítear in Airteagal 1 gach ceann díobh seo a leanas:

- (a) na feithiclí dá dtagraítear in Airteagal 1(1), a cheannach, a léasú, a fháil laistigh den Chomhphobal agus a allmhairiú;
- (b) caiteachas ar sholáthairtí earraí nó seirbhísí a dhéantar i ndáil leis na feithiclí sin dá dtagraítear in Airteagal 1(1) agus lena n-úsáid, lena n-áirítear breosla a cheannach.

Airteagal 4

1. Tiocfaidh an Cinneadh seo i bhfeidhm an dáta a thabharfar fógra faoi.
2. Beidh feidhm ag an gCinneadh seo ón 1 Iúil 2025 go dtí an 30 Meitheamh 2028.
3. Aon iarraidh ar shíneadh a chur leis an údarú dá bhforáiltear sa Chinneadh seo, cuirfear faoi bhráid an Choimisiúin í faoin 30 Meán Fómhair 2027 agus beidh tuarascáil ag gabháil léi ina mbeidh athbhreithniú ar an gcéatadán a leagtar amach in Airteagal 1.

Airteagal 5

Dírítear an Cinneadh seo chuig Poblacht na Slóvaice.

Arna dhéanamh in/sa ..., ...

Thar ceann na Comhairle

An tUachtarán
